



ATASSUT

UKA 2016/66

Siverth K. Heilmann

17. 10. 2016

Kalaallit Nunaanni aalisarfiusup iluani aalisartitseqatigiiffiup aningaasaataasa ikinnerpaamik inunnit aalajangersimasunit pigineqarnissaannik allaqqasoq assigalugu ingerlatseqatigiiffiup piginnittuisa agguagarsisarnissaasa aalisarnermut inatsimmi allaqqalersinnaanerata kingusinnaasai pillugit kingusinnerpaamik UKA 2017-imi nalunaarummik saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasorta, Hans Enoksen, Partii Naleraq)

Inatsisartuni ilaasortap Hans Enoksen, Partii Naleraq, aalajangiiffigisassatut siunnersuutaanut imatut ATASSUT-miit oqaaseqarfigissavarput.

Siunnersuuteqartutuulli tamatta ilisimalluinnarparput, aalisarnek Nunatsinni avammut niuernitsinni aningaasarsiornerput pingaarnersaasoq. Aap piniartuuneq aalisartuunerlu, qangaaniilli kulture-gaarput aamma siunissami ingerlaannarnissaa pingaartinneqartuarnissaalu ATASSUT-miit sulissutigiuassavarput. ATASSUT-illi oqaluttarfik manna atorlugu oqaasinnaaraa, pinngortitaq allanngorartuartup, immami nunamilu pisuussutitta naleqqussarfiguarneqarnissaat avaqqunneqarsinnaanngimmat, sunniutaasartullu pillugit atuisunik uumasorsiuunillu suleqatigiiffineqartariaqartut.

ATASSUT-miit isertuutissanngilarput, aalajangiiffigisassatut siunnersuummi qulequtsiunneqatoq tungavilersuutigineqartorlu paasiuminaatsilaaratsigu. Ingerlatseqatigiiffiit aningaasaataasa ikinnerpaamik inunnit aalajangersimasunit pigineqarnissaannik allaqasoqarnera assigalugu ingerlatseqatigiiffiup piginnittuisa agguagarsisarnissaasa aalisarnermut inatsimmut allaqasalernissaa kissaateqarneq apeqquserparput.

Qujanaqisumik nunaqavissut nammisortullu sinerissap qanittuani avataasiortunilu, namminneq ilungersornermikkut kisimiillutik arlaqarlutilluunniit aningaasaliisarnermikkut, inuussutissarsiuutitta pingaarnersaanni aningaasarsiorluarnermut suliffissaqartitsinernullu ingerlatsisunut pingaaruteqaqalutik

akileraarutitigut isaatitsisuupput. Nammineq kisimiilluni aalisariummut aningaasaliisimangikkutta, arlaqarlutaluunniit aningaasaliinigit assigiinngitsuusinnaasartut pilersitsiviusulli aamma inatsisiliortutut, iluarisaminnik iluarsartuussisinnaanerannik aporfissalersorneqaratik siunnersuuteqartutuulli taallugu, isummertitsiniarneq ATASSUT-miit assut akueriuminaatsipparput.

Aalisartitseqatigiiffinnimi aningaasaliinigit aallaavigalugit, piginnittuusugut ilaatigut ukiut arlaqartuni amigartooruteqarneq sinneqartoornermut isumannaatsumullu saatinneqareeraangata aatsaat piginnittut ukiumut agguagarsisinnaanerat aningaasaliisimaneq naleqqussagaq akuerisimasarlu aallaavigalugit agguagarsisoqartarpoq. Tamanna pisarpoq inatsisit naatsorsuutinillu tunniussisussaataanerme malitassat akuerineqarsimasullu malilluinnarlugit.

Namminersornerullutilli oqartussat pigisaanni aalisariutaannilu, inuttat akissarsitinneqartarnerat assigiinngeqisoq siunnersuuteqartumit eqqarsaataanut ilaasimappat, sulinerup akisussaaqqeqarnerullu nalilersoqqittariaqarnera ATASSUT-miit Naalakkersuisunut kaammattuutiginnassavarput naligiinnerusumik naapertuilluartumillu ajornartorsiutaasartut pitsaaqutit ilanngullugit inuttaasartunik peqateqarluni nalilersoqqullugit. Suliffeqarfissuarmi Royal Greenland-imi ukiuni arlalinni sulisimaneq soraarnermilu aningaasarpassuarnik tunniussisarneq ilanngullugu eqqarsaatigineqarsimappat ilumut pisariaqavinnersoq ilanngullugu nalilersorneqartariaqartoq Naalakkersuisunut periarfissaq iluatsillugu ATASSUT-miit Naalakkersuisunut kaammattuutigissavarput.

Naggataagut Naalakkersuisut siunnersuuteqartumut akissutaat siunnersuutillu akuerineqannginnissaanik inassuteqarnerat qaninneruvarput, taamaattorli ataatsimiititaliamut ingerlatinneqassagaluvarpat qulaani oqariartuutitta ilanngullugit nalilersorneqarnissaat ATASSUT-miit kissaatigissavarput.

Taakkuupput oqaatigiumasagut.

Qujanaq.